

RABU, 13 OKTOBER, 1982

PERHATIAN KEPADA MALAYSIA DI CHOGRM

PERSIDANGAN Serantau Ketua-Ketua Kerajaan Komanwel (CHOGRM) yang bermula esok di Suva, Fiji, tentu menarik perhatian kerana banyak hal dalam bidang politik dunia dan serantau, isu-isu ekonomi antarabangsa dan kerjasama akan dibincangkan dengan penuh semangat oleh Ketua-Ketua Kerajaan dari 17 negara Komanwel dari rantau Asia Pasifik. Walaupun penilialan kerjasama dalam bidang perdagangan, tenaga, industri dan pertanian dijangka akan ditekankan secara utama dan terperinci, namun lain-lain isu politik antarabangsa semasa seperti Kampuchea, Asia Barat dan Namibia dijangka tidak pula kurang hangat diperbincangkan.

Dalam sidang-sidang yang lalu, Malaysia telah memainkan peranan yang tidak kurang penting dari lain-lain negara. Hasilnya nyata. Dari daya usaha utamanya maka kini banyak negara di Pasifik Selatan seperti Fiji, Samoa Selatan, Papua New Guinea, Tonga, Kiribati dan Cooks Islands telah pun mendapat manfaat dari program-program yang dibawa oleh Ma-

laysia sebagai sebuah negara yang sedang membangun dan ingin pula menawarkan bantuan teknikalnya kepada negara yang ingin mendapatnya. Oleh kerana kemampuan Malaysia telah terbukti maka tentunya ia tidak boleh dielakkan dari mendapat perhatian sekali lagi.

Walaupun Kampuchea tidaklah termasuk dalam golongan negara-negara Komanwel, namun kerana soalnya yang masih hangat itu, ia akan mendapat tempat juga dalam majlis ini disebabkan apa yang berlaku di negara yang kini di bawah cengkaman Vietnam itu, memang mempunyai kaitan dalam rantau ini. Bertolak dari hakikat inilah maka Malaysia bersama dengan sokongan Singapura dijangka akan sekali lagi memainkan peranan penting bagi menonjolkan isu Kampuchea ini dalam persidangan ini. Dirasakan bahawa, walaupun tiga buah kumpulan — Khmer Rouge, Front Pembebasan Kebangsaan Rakyat Khmer (KPNLF) dan golongan Moulnaka — telah menandatangani pembentukan sebuah kerajaan campuran me-

reka di Kuala Lumpur Jun lalu, namun masalah bersangkutan dengannya masih banyak belum diselesaikan.

Malaysia dirasakan akan mengambil tindakan yang aktif dan tegas dalam hal ini kerana dalam kumpulan majlis ini masih ada lagi sebuah negara yang merasakan perlu memberi sokongan kepada puak yang bertanggungjawab menekan kebebasan rakyat Kampuchea. Usaha politik bagi mendapatkan sokongan yang lebih untuk Demokratik Kampuchea dalam sidang ini tentu boleh membantunya mengekalkan kerusinya dalam Pertubuhan Bangsa-Bangsa Bersatu nanti.

Apa yang nyata boleh dilihat dari sidang ini ialah bahawa Malaysia akan memainkan peranan yang lebih berkesan dalam hal-hal serantau dan kesimpulan ini memang boleh dibuat berdasarkan dari kesanggupan Perdana Menteri kita sendiri, Datuk Seri Dr. Mahathir Mohamad menghadiri dan mengetuai perwakilan Malaysia untuk kali pertamanya dalam persidangan seperti ini.